



Centurion se drome geknou en Tukkies in 'n verbete wen

Koos Venter

Terwyl Centurion se drome van 'n plek in die Superliga-halfeindstryd waarskynlik finaal neusie verby is ná hul verrassende nederlaag teen Springs, het Tukkies Saterdag 'n reuse-aanslag van Rustenburg Impala afgeweer om hul onoorwonne status te behou.

Tuks, Impala en ABE Midas Naka Bulle het reeds gekwalifiseer vir die halfeindronde, maar Centurion sal nou 'n klein wonderwerk nodig hê om Quins-Bobbies (QBR) uit die vierde plek te hou.

- Centurion het Saterdag in die Oos-Rand hul vierde agtereenvolgende nederlaag in die Superliga gely, toe Springs hulle met 31-26 verras het.

Springs het tot dusver goed meegeeding in die liga. Hulle het veral in die eerste paar wedstryde spanne soos Impala en QBR goed skrikgemaak, maar kon nog nie een van die top vyf klop nie. Saterdag het hulle egter hul deurbraak gemaak en Centurion se krisis-situasie in die liga dramaties vergroot.

Die 13-punte verskil tussen Centurion en QBR op die punteleer beteken dat Centurion sy laaste drie ligawedstryde teen East Rand

United (ERU) eerskomende Saterdag, QBR op 23 Junie en Tuks op 14 Julie almal met bonuspunte moet wen en dan moet hoop dat QBR geen ligapunte verdien in hul wedstryde teen Naka Bulle (9 Junie) en Impala (21 Julie) nie.

- Tuks sal waarskynlik heel bo aan die punteleer eindig, maar Nico Luus sal beslis nie tevrede wees met sy span se sukkelvertoning die afgelope naweek teen Impala nie.

Hoewel Tuks met 28-22 gewen het, kon hulle nie 'n bonuspunt verdien nie en die wedstryd was tot teen die einde in die weegskaal, nadat die halftydtelling 14-elk was.

Impala het veral beïndruk met die wyse waarop hulle Tuks voorlangs trompop geloop het. Hulle het die studente harde bene laat kou in die lynstane in by die afbreekpunte.

Die manne van Noordwes het die grootste deel van die tweede helfte oorheers, maar Tuks se verdediging moet krediet kry vir die wyse waarop hulle verskeie aanslae van Impala afgeweer het.

Slegs 'n puik geoefende beweging waar regtervleuel Stephan Coetzee laat in die tweede helfte vanaf 'n lynstaan aan die losskakel se binnekant ingesny het om die wendrie te druk, het Tuks gered van hul eerste nederlaag.

Heelagter Abrie Reynolds se skopvoet en die nege punte wat hy met strafdoele aangeteken het, was ook goud werd vir Tuks, aangesien die twee spanne elk drie keer gaan druk het.

- ABE Midas Naka Bulle het hulself intussen in die tweede plek op die punteleer gevestig met 'n wegholoerwinning teen ERU op hul tuisveld in die Moot.

Sylvester Booysen en sy manne het baljaar met tien drieë om met 71-28 te wen. Die gewese vleuel van die Bulls, Kefentse Mahlo, wat Saterdag op heelagter vir ABE Midas Naka Bulle uitgedraf het, het sy posisie as top driedrukker in die kompetisie versterk met 'n driekuns.



Tuks op die aanval in Saterdag se Superligawedstryd teen Rustenburg Impala. Foto: GB Jordaan.